

VENDIM
Nr. 246, datë 19.3.2015

**PËR NGARKIMIN E GARDËS SË REPUBLIKËS SË SHQIPËRISË PËR KRYERJEN E
PROCEDURËS SË PROKURIMIT PËR MARRJEN ME QIRA FINANCIARE TË
AUTOMJETEVE NË DISPOZICION TË DISA FUNKSIONARËVE PUBLIKË DHE
KRYEMINISTRISË**

Në mbështetje të nenit 100 të Kushtetutës, të nenit 6, të ligjit nr.9643, datë 20.11.2006, “Për prokurimin publik”, të ndryshuar, të ligjit nr.9396, datë 12.5.2005, “Për qiranë financiare”, dhe të neneve 2, pika 1, e 6, të ligjit nr.10160, datë 15.10.2009, “Për rregullimin e shërbimit të transportit për funksionarët publikë dhe nëpunësit civilë”, me propozimin e ministrit të Financave, ministrit të Punëve të Brendshme dhe ministrit të Transportit dhe Infrastrukturës, Këshilli i Ministrave

VENDOSI:

1. Ngarkimin e Gardës së Republikës së Shqipërisë, si organi qendror blerës, për kryerjen e procedurës së prokurimit, në emër dhe për llogari të autoriteteve kontraktore, të përcaktuara në lidhjen nr.1, që i bashkëlidhet këtij vendimi, për marrjen me qira financiare të automjeteve në dispozicion të përhershëm të Kryeministrit dhe të disa funksionarëve publikë, personalitete të larta shtetërore dhe të shtetit, sipas ligjit nr.8869, datë 22.5.2003, “Për Gardën e Republikës së Shqipërisë”, të ndryshuar.

2. Garda e Republikës së Shqipërisë, si organi qendror blerës, të prokurojë fondin limit, të llogaritur si shumë e fondeve buxhetore, të miratuar për çdo institucion të përmendur në lidhjen nr.1, që i bashkëlidhet këtij vendimi.

3. Autoritetet kontraktore, institucionet e përmendura në lidhjen nr.1, që i bashkëlidhet këtij vendimi, brenda datës 31 mars 2015, të dërgojnë në Gardën e Republikës së Shqipërisë, si organi qendror blerës, fondin përkatës, sipas numrit dhe tipologjisë së automjeteve të përcaktuara në lidhjen nr.1.

4. Garda e Republikës së Shqipërisë, si organi qendror blerës, së bashku me përfaqësues, në nivel teknik, të Ministrisë së Transportit dhe Infrastrukturës, të përcaktojnë specifikimet teknike, në përputhje me standardet teknike dhe kërkesat e sigurisë për automjetet që do të merren me qira financiare.

5. Garda e Republikës së Shqipërisë, si organi qendror blerës, është plotësisht përgjegjëse për kryerjen e të gjithë procedurës së prokurimit deri në përzgjedhjen e fituesit, ndërsa nënshkrimi i kontratës bëhet nga vetë autoriteti kontraktor.

6. Ngarkohen Garda e Republikës së Shqipërisë dhe institucionet e përmendura në lidhjen nr. 1, bashkëlidhur këtij vendimi, për zbatimin e vendimit.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Edi Rama

LISTA
E INSTITUCIONEVE QË DO TË MARRIN ME QIRA FINANCIARE AUTOMJETE
NË DISPOZICION

Nr.	Institucioni (autoritet kontraktor)	Automjet në dispozicion të funksionarit publik	Automjet në dispozicion të aparatit të institucionit
1	Presidenca	2	-
2	Kuvendi	4	-
3	Kryeministria	8	14
4	Ministria e Punëve të Jashtme	1	--
5	Ministria e Mbrojtjes	1	-
6	Ministria e Punëve të Brendshme	1	-
7	Ministria e Integritetit Evropian	1	-
8	Ministria e Financave	1	-
9	Ministria e Transportit dhe Infrastrukturës	1	-
10	Ministria e Zhvillimit Urban	1	-
11	Ministria e Zhvillimit Ekonomik, Turizmit, Tregtisë dhe Sipërmarrjes	1	-
12	Ministria e Arsimit dhe Sportit	1	-
13	Ministria e Drejtësisë	1	-
14	Ministria e Kulturës	1	-
15	Ministria e Mirëqenies Sociale dhe Rinisë	1	-
16	Ministria e Energjisë dhe Industrisë	1	-
17	Ministria e Bujqësisë, Zhvillimit Rural dhe Administrimit të Ujërave	1	-
18	Ministria e Shëndetësisë	1	-
19	Ministria e Mjedisit	1	-
	Gjithsej	30	14